

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 1 APRIL 2014, PUKUL 10.00 PAGI

Bil. 14

PERTANYAAN-PERTANYAAN BAGI JAWAB LISAN

1. PR-1321-L59508
Datuk Wira Haji Ahmad bin Hamzah [Jasin] minta **MENTERI KEWANGAN** menyatakan adakah langkah Kerajaan menstrukturkan semula ekonomi negara termasuk rasionalisasi subsidi dan bantuan terus kepada golongan sasar tidak akan membebankan rakyat sebaliknya mampu melonjakkan pertumbuhan ekonomi negara dan membawa negara keluar daripada perangkap "berpendapatan sederhana".
2. PR-1321-L60554
Tuan V. Sivakumar [Batu Gajah] minta **MENTERI KEMAJUAN LUAR BANDAR DAN WILAYAH** menyatakan sejauh manakah kejayaan '*Program Rural Business Challenge*' (RBC) telah berjaya membantu belia luar bandar. Berapa ramai belia yang memperoleh faedah mengikut negeri.
3. PR-1321-L59939
Dato' Seri Reezal Merican bin Naina Merican [Kepala Batas] minta **MENTERI TENAGA, TEKNOLOGI HIJAU DAN AIR** menyatakan perincian usaha pelaksanaan konsep kecekapan tenaga (*energy efficiency*) di bangunan-bangunan Kerajaan. Selain daripada penggunaan '*gas district cooling*', apa lagi strategi dan kaedah yang diguna pakai.
4. PR-1321-L59201
Tuan Idris bin Haji Ahmad [Bukit Gantang] minta **MENTERI DALAM NEGERI** menyatakan berapakah jumlah kes kecurian mesin ATM sehingga Disember 2013.
5. PR-1321-L59584
Tuan Haji Zainudin bin Ismail [Jelebu] minta **PERDANA MENTERI** menyatakan sejauh mana dasar dan program transformasi yang telah diperkenalkan oleh Kerajaan berhasil mencapai matlamat yang dikehendaki dan bagaimana pula tahap pemahaman dan penerimaan rakyat terhadapnya.

6. PR-1321-L59698
Dato' Dr. Tan Kee Kwong [Wangsa Maju] minta **MENTERI WILAYAH PERSEKUTUAN** menyatakan tarikh yang tepat berkenaan dengan pemindahan bazar larut malam '*uptown*' di Danau Kota.
7. PR-1321-L59557
Tuan William @ Nyallau anak Badak [Lubok Antu] minta **MENTERI KEMAJUAN LUAR BANDAR DAN WILAYAH** menyatakan kenapa pembinaan projek berikut belum lagi bermula seperti projek Jalan Bukit Tungku-Sayat-Soh dan Seremat, Jalan Sayat ke Nanga Kumpang dan Jalan Engkili-Bukong dan Cangkul.
8. PR-1321-L59431
Raja Dato' Kamarul Bahrin Shah [Kuala Terengganu] minta **MENTERI KESIHATAN** menyatakan adakah Kementerian mengeluarkan kelulusan daripada aspek keperluan piawaian kesihatan kepada Pasar Baru Cabang Tiga, Kuala Terengganu yang akan digunakan pada tahun 2014 ini.
9. PR-1321-L59976
Dato' Wira Mohd Johari bin Baharom [Kubang Pasu] minta **PERDANA MENTERI** menyatakan tentang Akta SPR 1959 di mana persempadanan baru kawasan Parlimen dan DUN akan dibentangkan. Bila dan apakah faktor-faktor tarikan dan tolakan yang menjadi asas kepada persempadanan berkenaan mengikut komposisi/kepadatan penduduk di sesuatu kawasan.
10. PR-1321-L60628
Tuan Mohamed Hanipa bin Maidin [Sepang] minta **MENTERI KERJA RAYA** menyatakan :-
 - (a) mengapakah Kerajaan tidak mahu mengambil alih pentadbiran lebuhraya di negara ini bagi mengelakkan Kerajaan daripada terus membayar pampasan kepada syarikat pemegang konsesi akibat tidak menaikkan kadar tol seperti mana terma perjanjian; dan
 - (b) dari tarikh perjanjian hingga kini, berapakah jumlah pampasan yang telah dibayar oleh Kerajaan bagi setiap pemegang konsesi tol di semua lebuhraya akibat keengganan menaikkan kadar tol dalam masa yang ditetapkan.
11. PR-1321-L60715
Puan Hajah Normala binti Abdul Samad [Pasir Gudang] minta **MENTERI KOMUNIKASI DAN MULTIMEDIA** menyatakan langkah yang diambil bagi menangani masalah Netbook 1Malaysia yang sering kali dilaporkan rosak sebelum sempat digunakan dan berapakah jangka masa yang diperlukan untuk proses membaik pulih kerosakan tersebut.

12. PR-1321-L60741
Dr. Michael Jeyakumar Devaraj [Sungai Siput] minta **MENTERI PERUSAHAAN PERLADANGAN DAN KOMODITI** menyatakan keluasan tanah yang diusahakan oleh Syarikat Perladangan Malaysia di luar Malaysia dengan memberi pecahan keluasan mengikut syarikat, negara asing, dan jenis tanaman.
13. PR-1321-L59588
Tuan Haji Mohd Fasih bin Haji Mohd Fakeh [Sabak Bernam] minta **MENTERI SUMBER MANUSIA** menyatakan langkah kerajaan bagi mengatasi masalah kesukaran untuk mendapatkan pembantu rumah warga asing khususnya Indonesia dan nyatakan langkah kerajaan bagi mengatasi masalah yang meruncing ini serta adakah kerajaan bercadang menyejajarkan pengambilan pembantu rumah warga Myanmar dan Thailand terutamanya yang beragama Islam.
14. PR-1321-L59537
Tuan Lim Guan Eng [Bagan] minta **MENTERI KERJA RAYA** menyatakan jumlah bayaran pampasan oleh Kerajaan kepada setiap syarikat konsesi tol untuk menunda kenaikan kadar tol tahun ini. Mengapakah penangguhan kenaikan tol tidak dilanjutkan kepada tahun-tahun depan. Nyatakan kos pembinaan dan jumlah yang diterima oleh setiap syarikat sejak lebuh raya masing-masing dibina.
15. PR-1321-L59661
Tuan Haji Hasbi bin Haji Habibollah [Limbang] minta **MENTERI SAINS, TEKNOLOGI DAN INOVASI** menyatakan apakah tindakan dan usaha Kementerian daripada segi pemasaran untuk Projek Penanaman Vanilla yang sudah pun menampakkan hasil di daerah Limbang.
16. PR-1321-L60029
Tuan Gobind Singh Deo [Puchong] minta **MENTERI KERJA RAYA** menyatakan apakah butir-butir terperinci berkenaan pembinaan Lebuh Raya KIDEX, pelan pembinaan dan kos serta masa pembinaannya.
17. PR-1321-L61081
Datuk Haji Shabudin bin Yahaya [Tasek Gelugor] minta **MENTERI PENDIDIKAN** menyatakan bilakah elaun guru besar dan pengetua sekolah akan dinaikkan dan berapa jumlah kenaikan tersebut.
18. PR-1321-L61262
Dato' Mohd Ariff Sabri bin Abdul Aziz [Raub] minta **MENTERI PELANCONGAN DAN KEBUDAYAAN** menyatakan:-
 - (a) adakah Kementerian akan meneruskan pembinaan 'cable-cars' untuk Fraser's Hill di Raub; dan
 - (b) apakah langkah Kementerian untuk meningkatkan daya tarikan Fraser's Hill sebagai tempat tumpuan pelancong.

19. PR-1321-L59403
Ir. Shaharuddin bin Ismail [Kangar] minta **MENTERI KOMUNIKASI DAN MULTIMEDIA** menyatakan penjelasan tentang bil telekomunikasi dan perkhidmatan internet yang semakin menekan pengguna. Walaupun perkhidmatan sudah ditamatkan, namun bil terus meningkat walaupun tiada servis yang digunakan oleh pelanggan.
20. PR-1321-L61010
Tuan Wong Ling Biu [Sarikei] minta **MENTERI KESIHATAN** menyatakan berapakah doktor dan jururawat yang berkelayakan berkhidmat di Poliklinik Sarikei pada masa sekarang. Bilakah Kementerian akan melaksanakan projek menaiktarafkan Poliklinik Sarikei memandangkan poliklinik tersebut sedang mengalami banyak kekurangan daripada segi kemudahan asas.
21. PR-1321-L60752
Datuk Madius Tangau [Tuaran] minta **MENTERI KERJA RAYA** menyatakan apakah langkah persediaan yang telah, sedang dan akan dilakukan untuk melaksanakan Projek Lebuhraya Telipok-Kiulu-Pukak-Pahu-Lokos-Rondoggung pada tahun 2015.
22. PR-1321-L60337
Puan Siti Zailah binti Mohd Yusoff [Rantau Panjang] minta **MENTERI PENGANGKUTAN** menyatakan apakah cadangan Kerajaan untuk penambahbaikan polisi pemakaian pramugari di semua jenis penerbangan dalam negara kita agar bertepatan dengan syaria Islam bagi kakitangan Islam dan sopan bagi kakitangan yang bukan Islam.
23. PR-1321-L59219
Dato' Haji Mohd Zaim bin Abu Hasan [Parit] minta **MENTERI SUMBER MANUSIA** menyatakan:-
- (a) jumlah pekerja Bumiputera yang telah diambil bekerja oleh syarikat kaum Cina di negara ini mengikut tahun semenjak tahun 2008 hingga sekarang; dan
 - (b) untuk menambah penyertaan pekerja kaum Bumiputera dalam syarikat-syarikat kaum Cina, apakah langkah tindakan yang diambil oleh Kementerian untuk mencapai maksud ini.
24. PR-1321-L60144
Tuan Teo Kok Seong [Rasah] minta **MENTERI PENGANGKUTAN** menyatakan secara terperinci tindakan pihak Kerajaan terhadap Syarikat Penerbangan Malaysia (MAS) mengenai aduan seorang penumpang yang menjumpai pembalut penutup luka di dalam nasi lemak yang dihidangkan kepadanya di dalam penerbangan MAS pada 6 Januari yang menjejaskan imej negara khususnya ketika Tahun Melawat Malaysia.

25. PR-1321-L60829
Datuk Rozman bin Isli [Labuan] minta **MENTERI PERTAHANAN** menyatakan adakah pihak Kementerian mempunyai rancangan untuk memberi peluang secukupnya kepada Labuan Shipyard (LSE) mengambil kerja-kerja pembuatan dan pembaik pulih aset-aset TLDM di masa yang terdekat ini memandangkan Labuan Shipyard (LSE) adalah satu-satunya limbungan kapal utama di Malaysia Timur.
26. PR-1321-L60817
Tuan Tony Pua Kiam Wee [Petaling Jaya Utara] minta **MENTERI KEWANGAN** menyatakan sebab Pekeliling Kontrak Perbendaharaan (PKP) untuk 33 item barangan biasa seperti ayam, daging, paip, kasut, pakaian, dan syarikat di Jadual 1 dan 2 yang tamat tempoh pada 31 Disember 2013 telah dilanjutkan walaupun Kerajaan telah memberikan jaminan "tender terbuka" untuk segala perolehan dalam Program Transformasi Kerajaan.
27. PR-1321-L61238
Dato' Sri Dr. Jamaluddin bin Mohd Jarjis [Rompin] minta **MENTERI PERTANIAN DAN INDUSTRI ASAS TANI** menyatakan langkah-langkah yang diambil oleh pihak Kementerian bagi membanteras:-
- (a) kegiatan pukat tunda/jerut haram yang berleluasa sehingga boleh menyebabkan kepupusan ikan-ikan layaran di mana ikan layaran merupakan satu produk (ikon) bagi tarikan pelancong-pelancong ke Rompin; dan
 - (b) bagi membendung kegiatan pukat tunda/jerut ini di samping melindungi spesies tersebut, apakah langkah-langkah yang sewajarnya perlulah diambil oleh pihak Kementerian.
28. PR-1321-L59722
Tuan Mohamed Azmin bin Ali [Gombak] minta **MENTERI KEWANGAN** menyatakan Bank Negara Malaysia (BNM) telah mengambil langkah untuk mengekang hutang isi rumah yang semakin meningkat. Apakah kesan pelaksanaan dasar ini terhadap anggota-anggota perkhidmatan awam yang memerlukan pinjaman daripada institusi kewangan.
29. PR-1321-L59341
Datuk Koh Nai Kwong [Alor Gajah] minta **MENTERI KEWANGAN** menyatakan adakah Kementerian mempunyai mekanisme baru bagi membendung pembelian barangan dan perkhidmatan dengan harga yang melampau tinggi daripada harga pasaran.
30. PR-1321-L60171
Tuan Ng Wei Aik [Tanjong] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sebab-sebab sebenarnya Akta Pengurusan Strata 2013 (Akta 757) belum dapat dilaksanakan walaupun perundangan baru tersebut dapat membantu pembeli-pembeli rumah serta badan-badan pengurusan bagi projek-projek pemajuan berstrata.

31. PR-1321-L59889
Tuan Liang Teck Meng [Simpang Renggam] minta **MENTERI PERTANIAN DAN INDUSTRI ASAS TANI** menyatakan apakah pendekatan yang diambil oleh Kementerian bagi memastikan pengeluaran makanan negara tidak terjejas akibat daripada bencana atau serangan penyakit.
32. PR-1321-L60672
Dr. Haji Izani bin Haji Husin [Pengkalan Chepa] minta **MENTERI PERUSAHAAN PERLADANGAN DAN KOMODITI** menyatakan punca kejatuhan harga getah dan apakah langkah-langkah Kementerian untuk memastikan harga getah kembali pada paras yang tinggi.
33. PR-1321-L60009
Dato' Sri Liow Tiong Lai [Bentong] minta **MENTERI DALAM NEGERI** menyatakan adakah Kerajaan bercadang untuk memberikan status kewarganegaraan kepada orang bukan warganegara atau pemegang MyPR yang berusia lebih daripada 60 tahun dan mempunyai bukti bahawa mereka dilahirkan di negara kita dan akan terus menetap di Malaysia.
34. PR-1321-L59694
Tengku Razaleigh Hamzah [Gua Musang] minta **PERDANA MENTERI** menyatakan benarkah dividen keuntungan bagi penyimpan akaun Tabung Haji dibayar mengikut kaedah 8 peratus bagi yang belum melaksanakan ibadah haji dan 6 peratus yang sudah melaksanakan ibadah tersebut. Jika benar, apakah rasional hingga wujud dua jenis dividen bagi akaun simpanan di Tabung Haji.
35. PR-1321-L60278
Tuan Jeff Ooi Chuan Aun [Jelutong] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah penalti yang telah diambil ke atas semua Pihak Berkuasa Tempatan (PBT), termasuk Majlis Perbandaran Pulau Pinang (MPPP) dan Majlis Perbandaran Seberang Perai (MPSP) yang gagal mematuhi Piawaian 108 hari bagi Kebenaran Merancang dan 37 hari bagi Kebenaran Bangunan yang ditetapkan oleh Majlis Negara bagi Kerajaan Tempatan. Nyatakan sama ada kelonggaran syarat diberi.
36. PR-1321-L61196
Dr. Hajah Siti Mariah binti Mahmud [Kota Raja] minta **PERDANA MENTERI** menyatakan status persempadanan semula kawasan pilihan raya, bila ia akan dikemukakan di Parlimen dan apakah status untuk mendapat konsensus daripada semua pihak yang berkepentingan (*stake holders*).
37. PR-1321-L61183
Dato' Sri Azalina binti Dato' Othman Said [Pengerang] minta **MENTERI KEWANGAN** menyatakan pendapatan bulanan yang diterima oleh seorang Ketua Pegawai Eksekutif Syarikat Berkaitan Kerajaan (GLC), khususnya bagi syarikat-syarikat seperti Perodua, Media Prima, Sime Darby, Maybank, CIMB Bank, Media Prima dan Proton.

38. PR-1321-L61145
Dato' Abdul Manan bin Ismail [Paya Besar] minta **MENTERI KEMAJUAN LUAR BANDAR DAN WILAYAH** menyatakan jumlah pelatih Giat MARA yang mengikuti kursus sejak diperkenalkan dan berapa jumlah kursus yang disediakan pada setiap Giat MARA di seluruh negara.
39. PR-1321-L59371
Datuk Dr. Makin @ Marcus Mojigoh [Putatan] minta **PERDANA MENTERI** menyatakan:-
- (a) siapa ahli-ahli serta negeri diwakili, yang dilantik sebagai Ahli Majlis Penasihat Petroleum Nasional seperti termaktub di bawah Akta Kemajuan Petroleum 1974; dan
 - (b) manfaat yang dinikmati oleh negeri-negeri pengeluar minyak sejak akta tersebut dikuatkuasakan.
40. PR-1321-L60539
Datuk Nur Jazlan bin Mohamed [Pulai] minta **MENTERI PERTAHANAN** menyatakan mengenai komitmen Kerajaan dalam membantu anggota tentera yang memilih untuk bersara awal serta sama ada langkah yang kini dilaksanakan benar-benar dapat menyediakan anggota berkenaan mendapat pekerjaan selepas menamatkan perkhidmatan mereka.
41. PR-1321-L59957
Dato' Othman bin Aziz [Jerlun] minta **MENTERI SUMBER ASLI DAN ALAM SEKITAR** menyatakan apakah langkah yang telah diambil oleh Kementerian bagi mengatasi masalah pencemaran udara akibat daripada pembakaran tandan buah kosong kelapa sawit (TBK) yang dilakukan secara terbuka dan berpanjangan bagi langkah pelupusan atau menghasilkan abu tandan bagi tujuan sumber baja.
42. PR-1321-L59766
Tuan Anuar bin Abd. Manap [Sekijang] minta **MENTERI PERTANIAN DAN INDUSTRI ASAS TANI** menyatakan Kerajaan baru-baru ini mengumumkan subsidi diesel diberikan kepada nelayan:-
- (a) apakah Kementerian bercadang memberi subsidi diesel kepada petani dan pekebun kecil; dan
 - (b) apakah tindakan daripada Kementerian bagi membantu petani ekoran daripada kenaikan tarif elektrik.
43. PR-1321-L60338
Tuan Haji Khalid bin Abdul Samad [Shah Alam] minta **MENTERI KERJA RAYA** menyatakan status Tol di Batu 3 dan Sungai Rasah yang UMNO Shah Alam menuntut supaya ianya ditamatkan.

44. PR-1321-L60040
Tuan Abdullah Sani bin Abdul Hamid [Kuala Langat] minta **MENTERI PENGANGKUTAN** menyatakan matlamat Kementerian untuk mengisi keperluan tenaga mahir maritim yang semakin meruncing.
45. PR-1321-L59225
Dato' Kamarul Baharin bin Abbas [Telok Kemang] minta **MENTERI PENDIDIKAN** menyatakan:-
- (a) berapa banyak buku-buku, majalah, jurnal dan penerbitan berkala Sains Bahasa Inggeris yang telah diterjemahkan oleh Dewan Bahasa dan Pustaka ke dalam Bahasa Kebangsaan; dan
 - (b) setakat mana ia telah digunakan sebagai teks di sekolah-sekolah menengah dan institut pengajian tinggi pada masa kini.
46. PR-1321-L60533
Puan Hajah Fuziah binti Salleh [Kuantan] minta **MENTERI SUMBER ASLI DAN ALAM SEKITAR** menyatakan usaha pemuliharaan dan pemeliharaan hutan dijalankan di bawah Dasar Perindustrian Kayu Negara. Berdasarkan *Google Earth Mapping* yang baru, Malaysia merupakan salah satu daripada tiga negara yang mempunyai kadar tertinggi penebangan hutan di dunia.
47. PR-1321-L61007
Tuan Shamsul Iskandar bin Mohd Akin [Bukit Katil] minta **MENTERI DALAM NEGERI** menyatakan rasional filem *The Wolf Of Wall Street* diharamkan tayangannya di Malaysia sedangkan ia merupakan terbitan Riza Aziz, anak kepada isteri Perdana Menteri, Datin Seri Rosmah Mansor, yang menelan perbelanjaan kira-kira RM325 juta.
48. PR-1321-L61060
Dato' Ahmad Fauzi bin Zahari [Setiawangsa] minta **MENTERI PENDIDIKAN** menyatakan adakah sebarang kajian semula dijalankan ke atas keberkesanan Bantuan Pelajar Sekolah serta Yuran PIBG:-
- (a) adakah pemberian RM100 bagi semua pelajar merupakan langkah yang tepat atau pemberian itu mestilah berdasarkan jumlah pendapatan keluarga; dan
 - (b) adakah sebarang garis panduan atau jumlah maksimum yang boleh diletakkan ke atas Yuran PIBG dikeluarkan oleh pihak Kementerian.
49. PR-1321-L60249
Dato' Seri Abdul Hadi bin Awang [Marang] minta **MENTERI LUAR NEGERI** menyatakan apakah maklum balas daripada OIC setelah Wisma Putra menulis surat kepada Setiausaha Agungnya meminta OIC mengadakan sidang bagi membuat ketetapan menyelesaikan konflik di Syria dan Mesir.

50. PR-1321-L59466
Tuan Sim Tong Him [Kota Melaka] minta **PERDANA MENTERI** menyatakan tentang pemantauan dan pengawalan projek-projek MEGA yang dilaksanakan oleh Kerajaan Negeri:-
- (a) jabatan manakah yang bertanggungjawab ke atas kerja ini; dan
 - (b) sejak tahun 2008, berapa buah projek MEGA negeri yang telah ditolak oleh Kerajaan Persekutuan.
51. PR-1321-L59740
Datuk Wee Jeck Seng [Tanjong Piai] minta **MENTERI KEWANGAN** menyatakan kelemahan dalam sistem cukai jualan dan cukai perkhidmatan (CJP) yang sedia ada di mana wajar untuk Kerajaan melaksanakan GST untuk menggantikannya.
52. PR-1321-L61133
Tuan Che Mohamad Zulkifly bin Jusoh [Setiu] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan sejauh manakah Kementerian berjaya mengawal kenaikan harga barang terutama barangan keperluan asas dan nyatakan langkah kerajaan bagi membendung kenaikan kadar inflasi Negara bagi memastikan ekonomi negara kekal mapan dan mampu berdepan cabaran ekonomi global yang mencabar.
53. PR-1321-L61047
Datuk Haji Datu Nasrun bin Datu Mansur [Silam] minta **PERDANA MENTERI** menyatakan apakah langkah dan usaha yang telah diambil oleh Kementerian dalam menjadikan wakaf sebagai komponen pasaran kewangan Islam yang lebih besar dan adakah rangka kerja undang-undang yang kondusif yang akan membolehkan pemerbadanannya dengan secara efektif.
54. PR-1321-L60512
Tuan R. Sivarasa [Subang] minta **MENTERI LUAR NEGERI** menyatakan langkah-langkah yang telah atau akan diambil oleh Kerajaan untuk menuntut kajian semula (*review*) keputusan Mahkamah Keadilan Antarabangsa (ICJ) pada 23 Mei 2008 berkaitan Pulau Batu Putih sebelum tempoh 10 tahun untuk kajian semula berakhir.
55. PR-1321-L59133
Dato' Wira Othman bin Abdul [Pendang] minta **MENTERI KERJA RAYA** menyatakan adakah Kerajaan bercadang untuk memanjangkan tempoh konsesi TOL lebuh raya ke suatu had masa tertentu supaya TOL tidak dinaikkan. Atau adakah kerajaan mempunyai cadangan lain untuk menghalang kenaikan TOL.

56. PR-1321-L60846
Tuan Chong Chieng Jen [Bandar Kuching] minta **MENTERI PENDIDIKAN** menyatakan sama ada Kerajaan ada rancangan untuk membina sebuah sekolah Kebangsaan Jenis Cina (SJKC) di daerah Stutong, Kuching memandangkan SJKC Chung Hua No.2 yang terletak di daerah itu tidak lagi dapat menampung permintaan daripada penduduk di kawasan itu.
57. PR-1321-L59988
Tuan Charles Anthony Santiago [Klang] minta **PERDANA MENTERI** menyatakan status kini selepas kajian yang telah dibuat untuk memperkenalkan sistem perlindungan sosial bagi pemandu teksi.
58. PR-1321-L59863
Datuk Joseph Salang anak Gandum [Julau] minta **PERDANA MENTERI** menyatakan apakah usaha-usaha Kerajaan dalam memastikan graduan kelas pertama di Universiti Awam diberi peluang untuk dilantik ke jawatan di sektor awam sebagai langkah menyerap graduan cemerlang dan menambahkan kualiti sektor awam.
59. PR-1321-L60378
Tuan Nik Mohamad Abduh bin Nik Abdul Aziz [Pasir Mas] minta **MENTERI BELIA DAN SUKAN** menyatakan justifikasi utama pihak Kementerian untuk membida bagi menjadi tuan rumah Piala Dunia 2034.
60. PR-1321-L60698
Ust. Dato' Dr. Mohd. Khairuddin bin Aman Razali [Kuala Nerus] minta **MENTERI PERUSAHAAN PERLADANGAN DAN KOMODITI** menyatakan jumlah kawasan tanaman tembakau yang bermasalah telah digantikan dengan tanaman kenaf dari tahun 2012 hingga 2013.
61. PR-1321-L59605
Dato' Seri Ong Ka Chuan [Tanjong Malim] minta **PERDANA MENTERI** menyatakan apakah komitmen dan pencapaian dalam memastikan semua bandar dan pekan diberi peluang untuk membina projek perumahan PR1MA dan memanfaatkan golongan yang berpendapatan rendah dan golongan generasi muda yang masih belum memiliki rumah sendiri.
62. PR-1321-L61104
Dr. Azman bin Ismail [Kuala Kedah] minta **MENTERI PERTANIAN DAN INDUSTRI ASAS TANI** menyatakan rasional pihak Kerajaan untuk tidak menghalang Bernas dari dinyah senaraikan dari Bursa Saham Kuala Lumpur.

63. PR-1321-L61137
Tuan Manivanan a/l Gowindasamy [Kapar] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sama ada Kementerian bersedia dan sekiranya tidak, apakah faktor-faktor yang menghalang Kerajaan untuk mengambil alih pengurusan rumah pangsa kos rendah, seperti sistem yang diguna pakai di Singapura di mana rumah-rumah pangsa kos rendah dengan unit berharga RM100,000 ke bawah dipertanggungjawabkan kepada Kementerian berkenaan.
64. PR-1321-L59850
Tuan Khoo Soo Seang [Tebrau] minta **MENTERI KESIHATAN** menyatakan bagaimana Kementerian bercadang membantu pusat dialisis pertubuhan-pertubuhan kebajikan mengupah doktor atau jururawat bertauliah agar menjamin mutu perkhidmatan mereka.
65. PR-1321-L59307
Tuan Haji Ahmad Nazlan bin Idris [Jerantut] minta **MENTERI PENDIDIKAN** menyatakan apakah benar wujud lambakan graduan pendidikan di pasaran yang belum dilantik dan jika benar, bagaimanakah langkah-langkah untuk mengatasinya.
66. PR-1321-L60301
Tuan Wan Hasan bin Mohd Ramli [Dungun] minta **PERDANA MENTERI** menyatakan apakah langkah-langkah tegas Kerajaan dalam menangani masalah perpaduan rakyat Malaysia yang dilihat rapuh dan boleh menimbulkan keretakan hubungan antara kaum dan agama.
67. PR-1321-L60302
Dato' Ngeh Koo Ham [Beruas] minta **MENTERI PENDIDIKAN** menyatakan siapakah yang menyediakan kertas-kertas dalam Bahasa Inggeris peperiksaan Sijil Pelajaran Malaysia 2013 kerana terhadap banyak kesalahan bahasa dalam kertas-kertas Biologi, Fizik dan Kimia. Nyatakan tindakan yang akan diambil supaya kertas-kertas peperiksaan Lembaga Peperiksaan Kementerian Pendidikan Malaysia akan menggunakan Bahasa Inggeris dengan betul.
68. PR-1321-L60193
Dato' Hasbullah bin Osman [Gerik] minta **MENTERI SUMBER MANUSIA** menyatakan mengenai seramai 1.24 juta individu di negara ini memiliki Sijil Kemahiran Malaysia (SKM) sekaligus membuktikan Malaysia berada pada landasan tepat untuk mencapai sasaran melahirkan 50 peratus tenaga kerja mahir menjelang tahun 2020. Sehubungan dengan itu, apakah pelan tindakan yang telah dirangka untuk memastikan sasaran ini dapat dicapai pada tahun telah ditetapkan.

69. PR-1321-L60305
Tan Sri Datuk Seri Panglima Joseph Pairin Kitingan [Keningau] minta **MENTERI PENDIDIKAN** menyatakan bahawa SMK Nambayan tidak mempunyai dewan sekolah, bolehkah Menteri Pendidikan meluluskan permintaan daripada sekolah ini untuk membina dewan besar sekolah yang amat diperlukan untuk kegunaan pelajar-pelajar SMK Nambayan, Tambunan.
70. PR-1321-L59522
Datuk Chua Tee Yong [Labis] minta **MENTERI TENAGA, TEKNOLOGI HIJAU DAN AIR** menyatakan apakah margin rizab elektrik Malaysia serta kos penjaan elektrik berbanding dengan negara-negara lain.
71. PR-1321-L61220
Puan Teo Nie Ching [Kulai] minta **MENTERI KERJA RAYA** menyatakan kontraktor yang membina Hospital Serdang, projek lain yang dibina oleh syarikat ini dan sama ada tindakan telah diambil terhadap keruntuhan siling.
72. PR-1321-L60128
Tuan Masir Kujat [Sri Aman] minta **PERDANA MENTERI** menyatakan apakah inisiatif yang telah diambil bagi meningkatkan jumlah OKU yang diterima masuk dalam perkhidmatan awam. Apakah alasan kegagalan warga OKU diterima masuk ke perkhidmatan awam walaupun kriteria minimum telah ditepati.
73. PR-1321-L60500
Dato' Noraini binti Ahmad [Parit Sulong] minta **PERDANA MENTERI** menyatakan apakah faktor-faktor utama yang lazimnya menyebabkan kelewatan pengeluaran sijil halal di bawah Sistem Pensijilan Halal Malaysia (SPHM) dan apakah purata jangka masa yang diambil untuk mengeluarkan sijil halal daripada tarikh permohonan tersebut diterima.
74. PR-1321-L60390
Dato' Haji Mahfuz bin Omar [Pokok Sena] minta **MENTERI PERTAHANAN** menyatakan berhubung cadangan untuk menutup Kem TUDM serta Lapangan Terbang Tentera Udara Butterworth. Apakah rancangan Kementerian ke atas tanah tersebut, di manakah tapak baru dan apakah kesan ke atas Perjanjian Kuasa Pertahanan Lima Negara (*Five Power Defence Arrangement - FPDA*) serta kesiapsiagaan tentera udara.
75. PR-1321-L60420
Tuan Ahmad Marzuk bin Shaary [Bachok] minta **MENTERI PERTANIAN DAN INDUSTRI ASAS TANI** menyatakan jumlah jam pegawai KADA berada di lapangan dalam menyelesaikan masalah petani. Apakah bukti KADA tidak berkhidmat ala kadar sebagaimana persepsi para penanam padi di Kelantan.

76. PR-1321-L59502
Dato' Haji Abdul Rahman bin Haji Mohamad [Lipis] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan pelan tindakan dan mekanisme untuk memastikan pengeluar, pengilang dan pemborong (bukan sahaja peniaga akhir) di dalam sesuatu jaringan pembekalan (*supply chains*) tidak sewenang-wenangnya menaikkan harga.
77. PR-1321-L61290
Datuk Ikmal Hisham bin Abdul Aziz [Tanah Merah] minta **MENTERI PERTANIAN DAN INDUSTRI ASAS TANI** menyatakan setakat ini berapa banyak pasar tani FAMA diwujudkan bagi membolehkan rakyat mendapat harga ikan dan sayur-sayuran dengan harga yang murah.

ATURAN URUSAN MESYUARAT DAN USUL-USUL

1. **Rang Undang-undang Perbekalan Tambahan (2013) 2014 (D.R. 1/2014) dan Usul Anggaran Perbelanjaan Pembangunan Tambahan Pertama 2013 seperti berikut:**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa jumlah wang tambahan sebanyak enam ratus empat puluh sembilan juta tiga ratus tujuh puluh lima ribu lapan ratus lima puluh ringgit (RM649,375,850) diperuntukkan daripada Kumpulan Wang Pembangunan bagi tahun kewangan 2013 bagi Maksud dan Butiran (Projek) seperti yang dinyatakan dalam ruang pertama dan kedua penyata Anggaran Perbelanjaan Pembangunan Tambahan Pertama 2013 yang dibentangkan sebagai Kertas Perintah 2 Tahun 2014 dan yang disenaraikan di sebelah Maksud dan Butiran (Projek) dalam ruang sembilan dan sepuluh penyata tersebut.”

(Menteri Kewangan)

Dalam Jawatankuasa sebuah-buah Majlis (1 April 2014)

- | | | | |
|----|----------------|--|-------------------------------|
| 2. | (D.R. 2/2014) | Rang Undang-undang Cukai Barang dan Perkhidmatan 2014 | Bacaan Kali Yang Kedua |
| | | [Menteri Kewangan] | |
| 3. | (D.R. 23/2013) | Rang Undang-undang Saraan Hakim (Pindaan) 2013 | “ |
| | | [Menteri di Jabatan Perdana Menteri] | |
| 4. | (D.R. 13/2013) | Rang Undang-undang Bahan-bahan Kakisan dan Letupan dan Senjata Berbahaya (Pindaan) 2013 | “ |
| | | [Menteri Dalam Negeri] | |
| 5. | (D.R. 24/2013) | Rang Undang-undang Pencegahan Pengubahan Wang Haram dan Pencegahan Pembiayaan Keganasan (Pindaan) 2013 | “ |
| | | [Menteri Kewangan] | |

6. **Menteri Kewangan akan mencadangkan:-**

"Bahawa Dewan ini, mengikut peruntukan di bawah Seksyen 5 Akta Persatuan Pembangunan Antarabangsa 1960, mengambil ketetapan supaya Malaysia membuat sumbangan kepada Program Penambahan Dana Ke 17 Persatuan Pembangunan Antarabangsa sebanyak USD27,000,000.00 (dua puluh juta sahaja)".

7. PR-1321-U59393

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, rakyat pada keseluruhannya berbesar hati dan mengalu-alukan usaha kerajaan dalam menangani masalah jenayah di negara ini dengan menubuhkan satu jabatan khusus dalam institusi kepolisan iaitu Jabatan Pencegahan dan Pembanterasannya Jenayah Polis DiRaja Malaysia.

Dan mengambil maklum juga, bahawa umum mengetahui bahawa Jabatan Pencegahan dan Pembanterasannya Jenayah PDRM ini hanya berfungsi di peringkat Ibu Pejabat Bukit Aman sahaja dan keanggotaannya amat terhad.

Dan mengambil maklum juga bahawa, kekangan yang dihadapi oleh JPPJ dan PDRM ini adalah disebabkan oleh kelewatan pihak Suruhanjaya Perkhidmatan Awam dalam memproses keperluan bagi perjawatan dan mengisi perjawatan dalam JPPJ-PDRM.

Dan mengambil maklum juga bahawa, rakyat dan masyarakat menaruh harapan serta kepercayaan penuh bahawa dengan tertubuhnya JPPJ-PDRM ini, kadar jenayah di negara ini akan dapat diturunkan pada kadar minima dan sekali gus menjadikan kebolehppercayaan rakyat mengenai dengan keselamatan negara ditingkatkan.

Maka, bagi menangani masalah yang dihadapi oleh JPPJ-PDRM ini, Dewan ini hendaklah mengambil ketetapan bahawa, pihak kerajaan hendaklah dalam kadar segera mendesak pihak Suruhanjaya Perkhidmatan Awam Malaysia untuk segera menyediakan perjawatan bagi semua jawatan yang diperlukan dalam Jabatan Pencegahan dan Pembanterasannya Jenayah Polis DiRaja Malaysia, supaya jabatan ini dapat ditubuhkan di semua peringkat, iaitu peringkat Pusat Bukit Aman, peringkat Ibu Pejabat Polis Kontinjen dan Ibu Pejabat Polis Daerah, agar fungsinya sebagai Agensi Pencegahan dan Pembanterasannya Jenayah dapat dilaksanakan dengan jayanya."

(Perdana Menteri)

8. PR-1321-U59394

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, sejak tertubuhnya Kawasan Keselamatan Khas Pantai Timur Sabah - ESSCOM, aliran keluar masuk pendatang asing kenegara ini, kini boleh dipantau sebanyak-sedikit.

Dan mengambil maklum juga, bahawa kawasan ESSCOM ini masih belum kebal-tembus oleh penceroboh asing yang selalu mengganggu-gugat keselamatan dan kedaulatan negara. Dan mengambil maklum juga bahawa, dengan aset sedia ada, kerja-kerja pengawasan dan perlindungan kawasan ESSCOM yang panjangnya sejauh 1400 kilometer amatlah rumit.

Dan juga mengambil maklum bahawa, pengendalian dan kos operasi aset-aset ESSCOM sedia ada amatlah tinggi dan bagi sesetengah situasi, agak merbahaya bagi anggota yang terlibat. Maka, bagi menangani masalah pengawasan dan perlindungan kawasan ESSCOM ini, dewan ini hendaklah mengambil ketetapan bahawa, selain dengan aset sedia ada, kerajaan hendaklah menggunakan khidmat kenderaan udara tanpa pemandu (*drone - unmanned aerial vehicle*) terutama sekali bagi menjalankan kerja-kerja pengawasan perairan ESSCOM."

(Perdana Menteri)

9. PR-1321-U59409

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, kedai rakyat 1Malaysia - KR1M menawarkan harga barangan 30% - 40% lebih murah berbanding dengan kedai biasa. Dan mengambil maklum juga, bahawa hasrat murni kerajaan untuk mengurangkan bebanan kos sara hidup rakyat ini amatlah disanjung tinggi dan seharusnya dinikmati oleh semua lapisan rakyat terutama sekali mereka yang berpendapatan rendah jauh di pedalaman.

Dan mengambil maklum juga bahawa, hampir semua KR1M terletak di pekan-pekan utama terutama sekali di negeri Sabah. Kedudukan ini serba-sedikit membantutkan usaha kerajaan untuk mengurangkan beban kos sara hidup kumpulan sasar - kumpulan berpendapatan rendah, dari segi kebolehcapaian pengguna. Misalnya, adalah tidak praktikal bagi pengguna untuk ke pekan hanya untuk membeli sekilo tepung.

Dan mengambil maklum juga bahawa, hasrat kerajaan dalam menubuhkan KR1M ini boleh dipanjangkan lagi dengan konsep merakyatkan KR1M. Yakni pihak KR1M bolehlah menyediakan perkhidmatan jurujual dengan menggunakan van atau pun lori, di mana jurujual ini akan masuk ke seluruh kedai-kedai runcit yang terdapat di kampung-kampung, mukim dan sebagainya bagi membekalkan produk KR1M.

Dengan kaedah ini, produk KR1M dapat di boleh-capai oleh semua lapisan rakyat Malaysia. Maka, bagi memenuhi hasrat kerajaan dalam penubuhan KR1M, dewan ini hendaklah mengambil ketetapan bahawa, pihak kerajaan hendaklah memperluaskan lagi kebolehcapaian KR1M dengan memperluaskan pasaran produk KR1M melalui kaedah di atas."

(Menteri Perdagangan Dalam Negeri, Koperasi Dan Kepenggunaan)

10. PR-1321-U59411

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, Sekolah Rendah Jenis Kebangsaan Hwa Shiong Putatan terletak berhampiran dengan Lebuhraya Putatan - Papar.

Dan mengambil maklum juga, bahawa sekolah ini menempatkan lebih daripada 700 orang murid sekolah di mana lebih daripada 50% murid ini akan menyeberang Lebuhraya Putatan - Papar, bagi tujuan menaiki bas, kereta atau pun berjalan kaki untuk pergi dan pulang ke sekolah.

Dan mengambil maklum juga bahawa, lintasan ini juga digunakan oleh orang ramai.

Dan mengambil maklum juga bahawa, selain Lebuhraya Putatan - Papar, murid-murid SRJKC Hwa Shiong dan orang ramai juga kena melintasi laluan kereta api bagi tujuan urusan harian mereka. Maka, atas faktor keselamatan, Dewan ini hendaklah mengambil ketetapan bahawa, pihak Kerajaan hendaklah mendirikan jejantas pejalan kaki, menyeberangi rel kereta api dan Lebuhraya Putatan – Papar Berhadapan dengan SRJKC Hwa Shiong demi untuk keselamatan murid-murid sekolah dan orang awam."

(Menteri Kerja Raya)

11. PR-1321-U60274

Dr. Tan Seng Giaw [Kepong] akan mencadangkan:-

"Bahawa Dewan ini membahaskan langkah-langkah yang boleh memperkukuhkan keamanan dan perpaduan negara majmuk ini".

(Perdana Menteri)

12. PR-1321-U60276

Dr. Tan Seng Giaw [Kepong] akan mencadangkan:-

"Bahawa Dewan ini membincangkan projek memperbaiki Dewan yang bocor, tempoh yang diperlukan dan jumlah perbelanjaan, sebagai contoh teladan kepada negara".

(Perdana Menteri)

13. PR-1321-U60277

Dr. Tan Seng Giaw [Kepong] akan mencadangkan:-

"Bahawa Dewan ini menyatakan kadar pembangunan Internet yang terkini di semua aspek berbanding dengan negara seperti Korea Selatan. Apakah jenis pembangunan dan jumlah kosnya serta prestasinya."

(Menteri Komunikasi dan Multimedia)

14. PR-1321-U59580

Tuan Fong Kui Lun [Bukit Bintang] akan mencadangkan:-

"Bahawa Dewan ini menggesa Suruhanjaya Pilihanraya Malaysia dalam proses untuk melaksanakan persempadanan semula kawasan pilihan raya hendaklah memastikan wujud keseimbangan pemilih antara pilihan raya dan mengelak perbuatan menggerimander (gerrymandering) yang merugikan para pemilih."

(Perdana Menteri)

15. PR-1321-U59582

Tuan Fong Kui Lun [Bukit Bintang] akan mencadangkan:-

"Bahawa dewan ini menggesa Kerajaan hendaklah menyalurkan peruntukan tahunan bagi Ahli Parlimen secara adil, baik untuk wakil rakyat BN mahupun wakil rakyat pembangkang sebagaimana cadangan Kerajaan Negeri Pulau Pinang untuk menyalurkan peruntukan yang sama diterima oleh wakil-wakil rakyat pembangkang kepada wakil-wakil rakyat BN mulai tahun 2014."

(Perdana Menteri)

16. PR-1321-U60610

Tuan Liew Chin Tong [Kluang] akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi RM100 juta oleh Kementerian Pertahanan, mesti dibawa ke Parlimen untuk dibahas dan diaudit oleh Jabatan Audit Negara untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan."

(Menteri Pertahanan)

17. PR-1321-U60119

Tuan Hee Loy Sian [Petaling Jaya Selatan] akan mencadangkan:-

"Bahawa Dewan ini menolak politik samseng dan perkauman serta menggesa perdebatan dasar secara rasional dan tanpa keganasan. Tindakan keganasan beberapa NGO pro-Kerajaan terhadap warganegara biasa dan mengugut bunuh Ahli Dewan Undangan Negeri Macang Bubok Pulau Pinang dan Ahli Parlimen Seputeh telah melanggar undang-undang jenayah Malaysia, oleh yang demikian pihak polis mestilah menyiasat suspek di bawah Kanun Acara Jenayah dengan segera. Biarlah rakyat jelata mendengar penjelasan dalam satu perdebatan yang sihat dan dengan ini Malaysia akan mengorak langkah ke satu kebudayaan demokrasi yang lebih matang.

Maka dengan ini Dewan hendaklah mengambil ketetapan untuk meminta Kerajaan melalui Peguam Negara untuk mengambil tindakan tegas terhadap pihak yang cuba meniupkan unsur perkauman dalam agenda politik mereka."

(Perdana Menteri)

18. PR-1321-U60120

Tuan Hee Loy Sian [Petaling Jaya Selatan] akan mencadangkan:-

"Bahawa Dewan ini mendesak Kerajaan menubuhkan mahkamah koroner yang tetap, bebas dan profesional bagi menjalankan inkues bagi semua kes kematian di bawah agensi-agens penguatkuasaan undang-undang."

(Perdana Menteri)

19. PR-1321-U61176

Tuan Manivanan a/l Gowindasamy [Kapar] akan mencadangkan:-

"Bahawa Dewan mempertimbangkan cadangan untuk kes kematian di bawah tahanan Polis Diraja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan. "

(Menteri Dalam Negeri)

20. PR-1321-U61180

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

(Menteri Pendidikan)

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN 2014</u>	<u>RISALAT/DOKUMEN</u>	<u>TARIKH DIBENTANGKAN</u>
ST. 34	Laporan Tahunan dan Penyata Kewangan Universiti Putra Malaysia (UPM) Bagi Tahun 2012	1 April 2014
ST. 38	Laporan Tahunan dan Penyata Kewangan Suruhanjaya Tenaga Bagi Tahun 2012	1 April 2014
ST. 39	Laporan Tahunan dan Penyata Kewangan Pihak Berkuasa Pembangunan Tenaga Lestari Bagi Tahun 2012	1 April 2014
ST. 40	Laporan Tahunan dan Penyata Kewangan Suruhanjaya Sekuriti Bagi Tahun 2013	1 April 2014